

ANTIYANONAN A GOZA HOPI DURANTE NAN 'DIA' NA HULANDA

Custum bernan tipico antiyano a ser demostra na hulandesnan

E festividadnan alrededor di e "Antilliaanse Landdag" 9. dia tipico antiyano riba cual antillanonan na tur parti di Hulanda ta reuni na un cierto punto) na Hulanda, a cuminsa cu bon pfa. Manera por a ser spera for di un principio, e muchanan antiyano a gana e partido di baseball contra un equipo for di vecindario di Den Haag cu e score abulta di 11-1. Esaki pues tabata un victoria resonante.

Despues di e partido Drs. K.H. Gorsira a entrega na ganador nan e copa, cual a ser poni disponibel pa e Ministro Plenipotenciario di Antillas Hulandes.

Sinembargo, segun e "dia" mes tabata acercando, e tempo na Hulanda tabata bira mas sombrio. Diasabra mainta 25 di juni nan a cuminsa lamta e tentnan grandi den un tempo friu cu yoda leve.

Den curso di dia sinembargo e tempo a claria un poco y di tal manera pues e tempo lo no a causa problema nan organisatorio mas durante e trabaunan di preparacion. Pero e mesun anochi ey un awacero pisa a cai, y den un rato henter e terreno a transforma den un plas grandi di lodo. Tempran diadomingo mainta e colaboradornan na e "Dia Antiyano" aki a cuminsa arregla e plaza di mercado y un otro cantidad di persona y trucknan tabata atravesar e terreno di lodo pa descarga cuminda y bebida.

E dia aki cu a cuminsa asina desfavorable di pronto a worde alegria pa un solo tibio, cual a haci e camnamento riba lodo posibel atrobe. Algopromecudiez' or y mei e organizacion a cuminsa hanja forma, pasobra padiez' or y mei e Dia Antiyano lo a worde habri oficialmente.

No obstante a dura te algo despues di diezun' or prome cu e apertura a tuma lugar pero tumando na cuenta e circunstancianan di e tempo, e organizadornan a worde pordona den tur sentido.

Hopi media di publicidad a muestra gran interes pa e suceso aki. Tabata presente entre otro, e

Nederlandse Televisiestichting cu un cuerpo completo di peli-cula, e Nederlandse Wereldomroep, cual lo a keda traha henter dia riba e terreno Duinrell, e Cinecentrum-Polygoon, y tres otro grupo di camera-men, cu ta traha pa diferente empresanan, y tambe varios fotografodiprensa y periodistanan di e principal diarionan di Hulanda. Pa un diez minuut pasa di diezun sr. H. Croes, miembro di directiva di Cadena Antilliana, a presenta na esnan presente e ministro plenipotenciario interino A.E. Booi. Sr. Booi a cuminsa cu expresa su gratitud na Baron Van Zuylen, e donjo di e terreno "Duinrell" y e comunidad di Wassenaar cu a coopera asina bon y cu na e apertura tabata representá pa burgemeester Mr. Geertsema, e lider di fraccion di VVD den Tweede Kamer. Luego sr. Booi a desea tur presente un "Dia Antiyano" yen di gozo y a expresa e deseo cu e tempo lo comporta durante henter dia. Ademas el a observa cu tabata imposibel pa e ministro plenipotenciario efectua e apertura pa motibo cu despues cu diasabra el a yega Hulanda for di Antiyas e tabata mucho cansa ainda di e viahe pa e por tabata presente. Despues cu sr. Booi a expresa su discurso y a declara e "Dia" como habri, a toca turno na sr. Geertsema. Den su speech corto el a compara Wassenaar cu Antillas Hulandes. E comunidad di Wassenaar ta trata na crea eventonan turistico nobo y pa probear mas tanto posibel di e posibilidadnan cu ta existi.

Den esaki sr. Geertsema a mi-



Un bista riba e plaza, na unda tabatin tentnan ta vende articulonan di fiesta, licores, souvenirs, etc. Prijs di un mango antiyano tabata dos florin, pero no obstante esey e bendedornan a keda contento cu e resultado di nan negoshi. Tur esaki a tuma lugar durante e "Landdag" Antiyano na Hulanda.

ra un parecido cu Antillas. Tambe e orador a insisti riba un fortificacion di e lazonan cu Antillas. En relacion cu esaki sr. Geertsema a muestra riba un cadena cu ta mes fuerte cu e wowo di mas debil. Si cos ta bai bon pa Hulanda, anto Hulanda lo tin di percura, cu tambe e partnernan den e Reino lo por probear di esaki. Cu e informacion cu e Instituto Meteorologico a pronostica bon tempo pa e dia ey, el a termina su discurso, despues di cual un aplauso cordial a resonar pa parti di e presentenan como gradicimento pa epalabranan di sr. Geertsema.

MISS CADENA 1966

Despues di e discursonan e publico presente a worde deleita cu e introduccion di "Miss Cadena 1966" srta. Maybeline Croes, yiu muher di sra. Aura Croes, di "Aura's Beauty Shop".

Maybeline ta studia canto y piano na Hilversum y ya tin dos anja na Hulanda.

Despues di unentre vista cu un di e hendenan di Nederlandse Wereldomroep, Maybeline a dirigi palabra na tur cu tabata presente na Duinrell. Luego e maestro di ceremonia Croes a anuncia cu e grupo di baile di Surinam lo duna un demostracion riba e pista grandi di baile den aire libre.

E grupo Antillano di baile mester a actua en principio, pero door cu sr. Rienhart, e lider di e grupo a hanja problema cu su auto na caminda pa Wassenaar, a ser dicidi pa laga e grupo surinamenjo actua.

Luego a actua tambe den aire libre y den e tentnan Julian Coco, kende no tabata confia e tempo y pesey a bin cu su papaplu pretu grandi, "Antillian Stars Steelband", cu a cosecha enorme exito, "Los Ases Latinos" cu a habri e baile, "The Creole Kats" cu nan cantante Julio, "Los Latinos" bau direccion di Lesley Farro y pa no lubida "The Jay-Jays". Roba e plaza, entretanto, nan a cuminsa haci propaganda pa e bebida y platonan y principalmente e damanan di e tent surinamejo a haci bon negoshi. Ademas a re-

sulta cu ainda tabatin hopi persona interesa den e vuelonan, e Cadena ta organiza pa Antillas

Folders tocante Aruba, viahenan di KNSM y KLM pa Antillas por a ser hanja den gran cantidad. Na e tent antiyano hopi persona a saborea un excelente plato di "suls".

Tambe e antiyanonan a topa hopi compatriota cu nan a kere tabata na Antillas ainda. Na un dado momento hasta un reunion completo a tuma lugar rond di Frere "chikito" Theodorus, kende a worde reconoce na tur parti pa e ex-alumnonan di Dominican College.

Y esey a socode hopi durante dia y esey en realidad tabata tambe lo mas alegre: e re-encuentro di hopi persona conoci.

E encuentranan a tuma lugar na tur parti: riba e pista di baile den e restaurant chikito, den tent, of na momento di presentacion un of otro actuacion, na unda di pronto bo ta hanja bopara banda di un conoci bieu.

Lo tabatin poco Antillano na Hulanda, cu no tabata presente na e "Dia" aki y esnan cu tog a keda cas, lo a mira e actividadnan na television y lo a pensa: "Caramba, no ta mihor cu nos tambe tabat'ey".



Antiyano- y Macambanan a troce pia den otro durante e baile anima pa "Antillian Stars Steelband" riba e pista di baile aire libre durante e "Landdag" Antiyano na Hulanda.

CENTRO DE OCULTISMO Y ESPIRITISMO

El más renombrado del Universo, compuesto de hombres eminentes de este siglo, quienes estudiaron el mundo del mas allá. Ellos estudiarán su vida mental y espiritual y todos sus problemas. Eliminarán todas las ocurencias penosas de su futuro. Cual es su problema? Cual es su sufrimiento? Consulte Ud el espíritu de la muerte completamente gratis. Mande Ud su fecha de nacimiento, nombre de un familiar ya muerto y \$ 1.-- para cubrir los gastos de correspondencia. Diriga sus cartas unicamente al director;

DOCTOR MINERVA OSIRIS
Apartado No. 2664 - Quito, Ecuador.



Aki "Miss Cadena 1966", srta. Maybeline Croes yiu di sra. Aura Croes di "Aura's Beauty Shop", ta ser entrevista pa un di e hendenan di Nederlandse Wereldomroep, durante e "Landdag" Antiyano na Hulanda.